



Jumat, 27 Oktober 2023
Ogen: Keluaren 15:21



Mimpin Ende-Enden



Rende e me sada dahin kalak si tek, sabap arah rende isehkenna puji-pujinna man Tuhan si mada kegeluhen. IA si ngaturken kerina dampar geluh manusia i bas kerina kecibalna. Alu bage pujin ngenca si banci si baba man baNa rikut penembahen arah kula ukur tendinta. Bage me si ilakoken Miriam i bas keriahen ukurna i ja isampati ras ipulahi Dibata ia i bas musuh si ngayak-ngayakca. Lawit merah si mbelang me si erbahan bangsa si ibaba Musa ndarat i Mesir nari menam idat kalak Mesir. Tentera Mesir alu geretana, lengkap pasuken si nterem, ersura-sura nebeng bangsa e ndarat i Taneh Mesir nari. I bas paksa e tentuna kebiaren ras jungut-jungut me si jadi dengen reh man Musa. Ijabab Musa alu ngataken gelah tetap ukur bangsa e dengen ngidah kai si ibahan Dibata man baNa kerina (14:13). Kenca lau ndai terbelah jadi dalan, i je me bangsa e erdalan, seh ia i kepar mulihi ersada lau e erbahanca kalak Mesir si ngayak-ngayak ia gedap dengen mombak kerina, sabap lanai banci erpusing geretana. Kiam ia kerina sabap igejabna Dibata me erperang guna kalak Israel.

Kejadin si mbelin enda me si erbahanca ukur kalak Israel tangkas i bas keriahen. Ibuatna gendang dengen kai si ilakokenna e iikutken diberu-diberu si nterem. Teridah arah kai si ibahanna e Miriam ncidahkan dirina enggo jadi pemimpin man kalak si nterem. Rikut ras sie rende me Miriam alu nuriken kerina kejadi e si jadi tanda perbahanen Dibata si mbelin, kerina e enggo iidah, inanami bangsa si nterem e. Tentuna kai si ibahan Miriam enda jadi usihen kalak si nterem bagepe tanda kiniteken man Dibata. Banci saja enda enggo me silakoken i bas geluhta, perban perbahanen Dibata i bas geluhta. Mari teruslah kita naksiken perbahanen Dibata i bas geluhta arah ende-endenta dengen si babai anak jabuta.

Tatap perbahanen Dibata dengen ajuklah sinterem muji IA